



# toegerus Elkeen ^ saam in Christus

*“Die hele Skrif is deur God geïnspireer en het groot waarde om in die waarheid te onderrig, dwaling te bestry, verkeerdhede reg te stel en ‘n regte lewenswyse te kweek, sodat die man wat in diens van God staan, volkome voorberei en toegerus sal wees vir elke goeie werk.” (II Tim 3: 16 – 17).*

Maak 2012 ‘n jaar waarin jy werklik volkome toegerus sal wees vir elke goeie werk! Wierdapark-Suid bied verskeie geleenthede reg deur die jaar.

Sommer van kleins-af (voorskool) wil ons vanuit ons **jeugbedieninge** elke ouderdomsgroep op ‘n unieke en eiesoortige manier aanspreek. As jy hoor van Babbelbekkies, Woelwaters, Rakkers, Champs, Tieners, Belydenisklas, Ichtus – dis almal gefokusde jeugbedieninge! Nie net deur middel van die tradisionele kategetiese nie, maar ook deur middel van kampe, pretaande, LAN-aande, oerleiding-geleenthede en praktiese dienslewering, wil ons jonk en oud toerus om waarlik lidmaat van God te wees.

Dan is daar ook nog (vir die meer **volwasse lidmaat**) geleenthede soos die Bybelskool (boodskap van die Bybel op vandag toegepas), Alpha (veral ook vir persone wat nog nie amptelik lidmaat van die NGK is nie) en Getroue Getuie-kursus (om die evangelie met ander te deel) wat DV aangebied gaan word. Moet ook nie die geestelike verrykingsaande wat ons vroue aanbied, vergeet nie!

Ons **kleingroep-bediening** (omgee-, sel-, Bybelstudie-, en intersessorsgroepe) vergader op verskillende tye en plekke gedurende die week. Moenie hierdie unieke geleenthede om geestelik te groei misloop nie! Voeg hierby ons doelgerigte omgeebediening waardeur ons spesifiek uitreik na veral siekes en eensames. Selfs tuisnagmaal-geleenthede word op versoek gereël

Dan is daar nog tientalle van ander geleenthede waartydens elke lidmaat sy/haar gawe kan uitleef en sodoende toegerus word om ander te kan toerus vanuit hul belangstellings. Daar is geleenthede soos die gasvryheidsbediening, nagmaalbediening, kantory,

musiekbedieninge, wêreldbiddae, eko-bedieninge, spyseniering (gemeente-funksies en begrafnisse), blomme-rangskikkings en kampe. Voeg dan ook hierby huisbesoek-geleenthede deur die leraars. Ons wil jou graag aan huis besoek. Laat weet asb die kerkkantoor of kontak sommer ‘n leraar direk. Sodoende leer ons mekaar ook beter ken.

Het jy ‘n spesifieke behoefte/droom vir 2012? – laat weet ons, en ons begin dit (indien enigsins moontlik)!

**‘n Toegeruste lidmaat is ‘n meelewende lidmaat.**



# reik uit Elkeen ^ saam in Christus

*“Dra mekaar se laste, en gee op die manier uitvoering aan die wet van Christus” (Gal.6:2)*

Wierdapark-Suid wil in wese ‘n uitreik- (en omgee-)gemeente wees. Daar word op baie verskillende maniere uitgereik.

- Ons gemeente ondersteun **sendelinge**, Alfred en Belinda Paetzold (oud-lidmate van ons gemeente) wat in die mees noordelike deel van Mosambiek onder onbereikte mense werk. Ons is ook in samewerking met ander gemeentes by Soekmekeer (naby Polokwane) betrokke.
- Dan word daar ook nog na ander **buurstate** soos Lesotho

en Zimbabwe uitgereik. Van ons jongmense is ook by stranddienste in KwaZulu-Natal betrokke. Hulle het ook by die echo-jeugbedieninge (hawelose kinders in die stad) betrokke geraak.

Ons gemeente reik ook op ‘n baie konkrete manier na baie inrigtings en ander mense met spesifieke behoeftes in die omgewing uit. Die bekendste hiervan is

- **Jakaranda-kinderhuis** waar ons vir ‘n huis met tienerdogters verantwoordelikheid neem.
- Ons **kanker-mense lê** ons baie na aan die hart. Ons eie jaarlikse kansa-tee, asook inskakeling by Rooi Rose se kansa-tee, is van die vele hoogtepunte op ons jaarprogram.
- **Rusoord**, ons plaaslike aftreeoord, geniet ook besondere aandag by ons, met ons talle vrywilligers wat daar werksaam is.
- **Reddingsdaad**, ‘n sentrum vir werkloos in Danville, geniet ook deurlopend aandag by ons met ons gevriesde sopprojek en ondersteuning van die bykans 300 erg behoeftige kinders daar.
- Dan is ons ook nog betrokke by **blindes** (ondersteuning van gidshonde), asook **dowes** (loslittag).
- Wierdapark-Suid werk ook nou saam met ons plaaslike **Christelike Maatskaplike Raad (CMR)** wat op velerlei terreine ‘n baie professionele ondersteuningsdiens lewer.
- **Die Christelike Afhankheidsdiens (CAD)** is ‘n ondersteuningsgroep vir gerehabiliteerdes en hulle geliefdes in die groter omgewing.
- Plaaslik raak die saak van ons behoeftige lidmate (**alimentasie**) ook ‘n al hoe groter uitdaging.
- Nuwe doelwitte vir 2012 is om ook plaaslik na **Olievenhoutbosch** en die **gevangenis** uit te reik

**Deernis is twee harte wat saam een vrag trek**

